

Yahdaiq Mbaetyungh

Daiq gou bineix roekcib sam bi, de ce byoemgyaeuj dinj riengz rwz. Ndwenngoenz lumjbaenz gyaetz de lai, cungj cinj de bi'ndwen gvaq va'gyap, hoeng naengnoh ciuqgaeuq hauoiq, da ronghsagsag, yawj hwnjbae beij boux caemhsaemh coz hauilai lo!

Daiq ngoenz gwn yungh, mbaetyungh lumjbaenz cungj gaek youq ndaw sim de. Gwn haeux seiz, danghnaeuz gwnz daiz doek saek naed haeux, de sikhaek gip hwnjdaeuj dawz haeuj bak bae, lij riu dwk naeuz: "Gij gwn doek gwnz daiz mbouj gvaq caet miux cung cungj lij baenz gwn, mbouj ndaej sai o!" Baez lauxsae hawj dou vuenh bonj cozyez moq, daiq couh lumj boux cangh ak he, dawz bonj cozyez gaeuq gij mbaw mbouj caengz yungh gvaq de sik roengzdaeuj, yungh aendingsaw daeuj dingbaenz bonj moq hawj gou.

Geiq ndaej baezhaenx, buh gou

vaih congh iq ndeu, gou laihnaeuz yaek ndaej cawx buh moq lo, daiq couh baetbaet fwngz, naeuz: "Buh byoengq congh iq ndeu couh vuenh moq, hojsik lai lo, gou siengj banhfap fong de!" Gou dingq gij vah neix, bak mbit hwnjdaeuj, utheiq dwk dingj: "Daenj buh fong, ngaiz bouxwnq riu gou!" Daiq mbouj gangj vah, cienq ndang bae menhmenh dawz aen sieng bauj de okdaeuj, mbouj geij nanz couh fan ok mbaw baengz he. Gou baez yawj, mbaw baengz gwnzde siuq miz duz douq gang liengj riuw swx, doq naeuz: "Dozanq neix gyaendei lai lo!" Daiq riuriu, gijmaz hix mbouj naeuz, cix dawz gingqda, raed gij dozanq roengzdaeuj, bu roengz gwnz congh buh vaih bae, baez cim baez cim nyib hwnjdaeuj. Gij din mae youh iq youh yinz, yawj mbouj ok maet lawz dwg riz fong. Nyib liux le, daiq mbe hai geu buh, daekeiq dwk doiq gou



naeuz: "Mwngz yawj, gij buh neix gizlawz miz denh fong? Faenmingz dwg fuk doz he!"

Boux neix couh dwg daiq gou, de mbaetyungh, coengmingz youh

maenh'ak, hawj ndwenngoenz bingz-ciengz roenx rim gij gyaendei saepsoiq.

(Cangh Sihyanz raiz Veiz Yen'gyangz hoiz)

Rumzlangh Ndaw Ranz



Haemhlwenz, daxboh daxmeh doxceng lo.

Hainduj doxndaq, gyoengqde sing hung cenghumhum, doeklaeng couh boux mbouj leixlangh boux, ndaw ranz cungj mbouj raen doenghbaez gij miz gangj miz riu doxhuz doxyaez haenx lo. Gou dangguh gij hamh geb ndaw bingj, ndaw sim luenhcabab.

Haetneix, gij heiq ndaw ranz ciuqgaeuq gaenjieng hawj gou diemheiq mbouj gvaqdaeuj. Aenvih daxboh daxmeh doxceng, ngaizromh hix bienqbaenz luenhhuhu: Gyaeg-gaeq cau baenz ndaemndat, cijvaiz hix gyoetgyatgyat.

Banringz gwn ngaiz sat, gou gietdingh roi sim daxmeh, couh daiq daxmeh bae youzbyaij. Gou siujsim

yupyup caeuq daxmeh gangj: "Daxmeh, daxboh hix dwg gvansim mwngz, mwngz mbouj wnggai yiengh-neix caeuq daxboh gangjavah..." Gou lumj yied gangj yied vaih saeh, saeknaj daxmeh yied daeuj yied yak-yawj. Baez ma daengz ranz, de couh ndatheiq dwk hongz daxboh: "Mwngz gvaqmauh dahraix, baez doxceng couh hawj lwgnyez daeuj hongz gou!"

"Vanzlij mbouj dwg mwngz ceng gonq!" Gij ndatheiq daxboh doq deng diemjdawz, de naj hoengz rwz dik youh caeuq daxmeh doxceng hwnjdaeuj. Sing daxboh daxmeh yied daeuj yied hung, lumjnaeuz yaek biengj dingjranz bae nei. Gou gaenbonj gangj mbouj ndaej vah, fouznaih ndwn youq bangxhenz.

Banringzgvaq ma daengz ranz, gou yawjraen daxmeh naengh youq gwnz sahfaez yawj soujgih, ndaw uk fwt mauh'ok aen cawjceiq ndeu. Gou byaij daengz dangqnaj daxmeh, cam: "Daxmeh, ndaej ciq soujgih mwngz caz swlhliu lwi?" "Dawz bae ba!" Daxmeh mbouj ngeizlaengx saek di dawz soujgih hawj gou. Gou dawz soujgih daxmeh, byaij daengz henz ndeu, laeglemx hai gij gaimen gangjgoj veihsin daxboh, hag gangjfab

daxmeh fat le duenh vah ndeu hawj daxboh: "Doiq mbouj gvaq, dwg gou cungdoengh lai, mbouj wnggai doiq mwngz baenzneix yak..." Fat sat le, gou couh dawz geiqloeg gangjgoj cat lo.

Dingh— Mbouj gvaq geij faencung, soujgih veihsin yiengj sing ndeu. Daxmeh dawz ok soujgih baez yawj, gwnz naj yienh ok saekriu. De buet haeuj ranzdajcawj, nyaengq-foedfoed hwnjdaeuj.

Gvaq le yaep ndeu, daxboh dauqma lo, ndaw fwngz lij riuw gij saejdaeuz daxmeh ceiq haengj gwn haenx. Daxmeh dingqnyi sing yiengj, daj ranzdajcawj yo gyauej okdaeuj, song boux lwgda doxcim, mbouj raen song boux de najhaen hozbongz lo. Daxboh ae sing ndeu, gangj: "Gou cawx le saejdaeuz mwngz haengj gwn. Mwngz ngoenzneix baeg luba? Gou bang mwngz guh saeh." Gangj le, daxboh byaij haeuj ranzdajcawj, caeuq daxmeh itheij cawj caeuz. Gou ndoj youq baihlaeng dou, ndaw sim cungj dwg vaiqvued.

Seiz gwn caeuz, dou sam boux humx naengh youq henz daiz gwnhaeux, angq dangqmaz.

(Cwnz Yiyenz raiz Lingz Hinghningz hoiz)

Gaeb Duzbaeu

Seizhah ndit ndatfwdfwd, aensim hix ndatfwdfwd. Raemxlangh ndaw haij baez dem baez nyoengx hwnj hamq haij, gienj hwnj duj valangh hausaksak.

Banhaet haj diemj cung, raemx-cauz doiq lo, gou caj mbouj gib buet bae coh daihhaij. Gwnz haij roemj miz caengz dem caengz mokmbang, mok-mbang mokmak, lumj aen dieg sien nei. Youq giz gya haenx, geij goengq bya iq youq ndaw mok yaek raen yaek mbouj. "Va! Dwg bang baeu ndeu!" Gou raen duzbaeu baenz gyoengq

baenz bang youq gwnz sadan vangved luenh raih, lwgda gou yaepyet couh rongh lo: Buet ha! Bae gaeb baeu!

Gou ndiengq giuj hwnjdaeuj, ndaw fwngz gaem gaem nywjhaij hung ndeu, gungj hwet, lwgda cimyawj duzbaeu, siujsim riri depgaenh de, swnh duzde mbouj roxnyinh, "ba" sing ndeu, duzbaeu iq deng goemq youq laj nywjhaij lo. Duzbaeu lij youq lwi? Gou geizheih dwk biengj nywjhaij daeuj yawj, "yu, duzbaeu lij youq bw!" Gou siujsim dwk dawz duzbaeu coq haeuj ndaw doengj bae.

Ndit ciuq roengzdaeuj, raemx ndaw doengj rongh gim myanmyan, yawj gij baeu ndaw doengj haenx, ndaw sim gou gaej dwen miz geijlai angq lo! Doeklaeng, gou menhmenh cij ra raen aen banjdaeuz gaeb duzbaeu, couhdwg aeu vaiq, cinj, haeng! "Youh gaemh dawz lo! Gaemh dawz lo!" Gou hemq mbouj dingz, raen duzbaeu ndaw doengj yied daeuj yied lai, gou sim-angq dwk siengj angj hawj daengx seiqgyaiq!

Sing hemq gou hawj aen daengngoenz haeujsim gou, aen de daj mbiengj naj iq ndeu hainduj, bienqbaenz aen daengngoenz hoengz luenzlulu ndeu, ndit saekgim haenx

ciuq doh gwnz deih, lumj dwg dajciengj hawj gou nei.

Langh da yawj bae, aen daihhaij lumj ndaek rinbauj seuqsak ndeu nei ndongqliklik. Gizgyae, mbwn lamz-yubyub hix yungzhab haeujbae lo, caen dwg mbwn raemx saek doxdoengz. Raemx gwnz haij rongh-yeyeb, lumj gaiq rinbauj sieng gim nei ronghmyanmyan.

Daihhaij sawdikdik, langhraemx hausaksak, daengngoenz ok gwnz haij, duzbaeu iq guhlaeuh, doengh gij neix baenzlawz mbouj dwg ranghdieg funghgingj gyaendei ndeu ne!

(Cenz Gyahyz raiz Veiz Yennaz hoiz)